

بِسْمِ اللَّهِ الرَّحْمَنِ الرَّحِيمِ

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

## KHUTBA JUMMAH

### HADHRAT MUHYI-UD-DIN AL-KHALIFATULLAH

#### MUNIR AHMAD AZIM

25 Octobre 2019

26 Safar 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

#### BANE MUSULMANS DANS LA POLITIQUE

Musulmans pas en droit ordonne le mal. Mais bizin aussi pas cautionne le mal. Après ki nous pé trouve autour de nous saki pé passé, faudré **JAMAIS** nous vote ene madame musulmane ki pas vraiment réfléchir le *Deen-e-Islam* dans li. Par so l'ignorance de *Deen*, li pou faire bane kitchoses ki pou faire Allah en colère. Mais bane ki fine vote li, zot ena ene compte pou render.

Ene musulman, ni li faire le mal mais ni li cautionne le mal aussi. Tant ki sa sœur là reste dans désobéissance Allah, nous ena ene part de responsabilité là-dans. C'est nous ki fine mette li là-bas. Ki sanlà accepter saryé péchés les autres ? Pendant 5 ans li pou reste dans pouvoir. Réfléchi 10 fois avant alle voter. Ene musulman pas tombe dans même trou deux fois.

La Communauté Musulmane jamais fine mandate kit député musulman [que ce sois madame ou missié] pou défendre li. Presque tous musulmans dans sa pays là conne sa gouvernement présent là antimusulman, sauf pou quelqu'un ki pé gagne zot boute are li, et de tous temps fine exister sa catégorie dimoune là, ki fine guette zot l'intérêt au lieu l'intérêt de l'*Oummah* et de zot pays. Ou fine trouve ki sa parti majorité ki au pouvoir dans sa l'alliance là, combien, combien ministres

musulmans ena! Doucement, doucement li fine débarrasse bane musulmans ki trouve autour de li. Mais par contre ena dimounes ki appartenir à la communauté majorité, zot pé être protéger, même zot pé fanner lors fanner ! Saki pé arrive à la Communauté Musulmane à l'île Maurice c'est même politique ki BJP (Bharatiya Janata Party) pé appliquer en Inde.

Valeur du jour, la Communauté Musulmane pas fine mandate aucaine femme musulmane pour vine so porte-parole au parlement ou au gouvernement. Islamiquement parlant, la femme musulmane péna droit être à la tête d'ene l'état car c'est à l'homme, le créature supérieur [dans lizié d'Allah & comme établi dans le Quran Shareef] pou prend sa responsabilité là. D'ailleurs la femme musulmane au sein de n'importe ki parti politique li loin du *Shariah*. Zot l'habillement et zot participation dans bane activités anti-Islamique pas permette zot pour vine porte-parole de la Communauté Musulmane.

La Communauté Musulmane pé passe bane moments difficiles de so l'histoire, mais nous ena l'espoir ki Allah pour aide nous et ki à l'avenir nous à va gagne bane dimounes sincères ki ena à cœur l'intérêt de sa communauté ki fine tant souffert et abandonné, et ki pou vraiment défendre so l'intérêt. Dans sa gouvernement actuelle là, seule communauté ki sans porte parole, c'est la Communauté Musulmane. Même bane ki fine servi sa communauté là pou vine au pouvoir fine ignore nous, mais mette bien dans la tête ki jamais Allah (swt) pour abandonne So bane serviteurs. Quand à bane ki pé déclare zot nationaliste après ki zot fine élu grâce à vote de zot communauté, zot jours au pouvoir pé fini bientôt, *Insha Allah, Ameen*.

Nous pé attane zot de pied ferme lors terrain kan zot vine mendier votes. Donc, pense bien avant zot vine rode zot vote avec sa communauté là. Beaucoup politiciens musulmans déclare zot fidèles à zot parti. Ena parti ki beaucoup bane règlement alle à l'encontre *Shariah*. Sa bane musulmans là vine bane « *Yes man/Woman* » de zot soi-disant leader. Même ena fine alle à l'encontre de bane l'enseignements Islamiques en votant bane la loi anti-Islamique. Pour faire zot parti plaisir, ena fine vote contre *Muslim Personal Law*. Mais zot oublier ki Allah fine différencier entre *Kafir*, *Mushrik* et *Mumin*. Zot fine prend comme camarades bane *Kuffar* au détriment de bane croyants. Zot pas fine oser lève zot la voix pour zot propre communauté.

Là même mo donne zot ene l'exemple couma bane politiciens musulmans zot fine vine bane *yes man/ woman*. Personne péna courage pour discute congé public pour la Communauté Musulmane le jour de *Eid-ul-Adha (Bakr-Eid)*. Sa le plus grand Eid pour nous ; Eid de sacrifice kot nous faire 3 jours de *Eid-ul-Adha* et même le premier jour personne pas pé capave, ni gagne le courage pour discute pour gagne ene jour congé public.

Ena beaucoup nous bane frères et sœurs pé bizin travail sa jour là [le premier jour de *Bakr-Eid*]. C'est ene *Zulum* sa et sans critique bane les autres religions pour zot fêtes, zot ena plisse ki 2 ou 3 jours congé ! Kot nous pé aller ? Après nous dire ena ene seule le peuple, ene seule nation. Avec connaissance de cause zot conner ki zot communauté pé gagne crazer mais sa pas affecter zot di tout, pourvu zot pé guette zot propre l'avantage. Pou profiter dans travail pou aider dans faire la justice et faire la voix de zot communauté tender, sa non! Mais zot plutôt guette zot propre l'intérêt: l'argent et l'honneur mondaine.

Bien souvent beaucoup sa bane politiciens ki ena noms musulmans pas jouir de sa deux kitchoses là. Et l'histoire li là pour prouver de saki nous pé dire. Car Allah Li Juste. Et voilà ki soudain kan sa bane politiciens musulmans là gagne pousser humiliante avec zot parti, lerlà zot tourne vers zot communauté. Zot pareil couma sa bane dimounes ki jamais zot pense Allah, zot faire Maja Karo et kan zot fine trouve zot dans bane extra difficultés, zot crier: « *Allah! Allah!* ». Sa bane politiciens musulmans là, zot aussi zot pareil, zot crier: « *Ummah! Ummah!* ». Trop tard, et zot mandat pé alle fini. **JAMAIS** zot fausse leader pour reprend zot car li ena ene « *hidden agenda* ».

Politiquement zot fine mort mais au moins spirituellement zot pé bizin levé maintenant. Zot bizin tire ene leçon du passé. *Orni* lors la tête, la route vers *Arafat*, guide pour bane *Hajjee* etc. Zot ena la capacité pour faire tous sa là, mais eski zot pé faire li et si zot pé faire li, comment zot pé faire li ? En pensant à mondaine pour bribe spirituelle, ou sois zot trouver astaire ki zot bizin repentir et réforme zot la vie en tant ki bane vrais musulmans ki ena *Taqwa* ?

Nous laisse le soin à la nouvelle génération politicienne musulmane pour tire leçon de saki fine passer car l'histoire c'est ene miroir. Et mette sa bien dans la tête **JAMAIS**, au grand **JAMAIS**, sa bane là pour vine pou nous. Réfléchis et zot pou trouver ki nous ena raison. Après tous, c'est pas nous ki dire sa, mais c'est le

**CRÉATEUR** ki dire sa. **Ene conseil** : Bane ki zot parti fine donne zot congé, pas ré-vini !

Kan nous guette comportement certains ministres envers la population, c'est malheureux ki ene fois au pouvoir, zot oublier sa bane dimounes là. Ena dimounes pauvres jamais fine mendier dans zot la vie et zot fine mort avec l'honneur. Mais par contre combien ministres fine bizin quitte zot chaises ministres avec la honte. Et zot oublier ki quantité mendier, zot fine mendier et cela zot fine faire porte à porte pou ki zot capave assize lors sa chaise ministre là. Mais ene fois là-haut, zot croire zot fine vine bane terribles pou sa 5 ans là. Et dans sa pays là kot chaque ministre pé protège so montagne, la Communauté Musulmane fine vine l'enfant pauvre dans n'importe ki régime ki vine au pouvoir dans sa pays ki ena la puanteur du communalisme dans tous coins et recoins. Bane musulmanes ki fine assize dans bane cabinets ministériel pas pou capave contredire saki nous pé dire.

En disant tous sa, à chaque fois ki ene membre de la Communauté Musulmane senti li victime d'ene injustice venant du pouvoir, l'état faire la sourde d'oreille. Sa dimoune là bizin lutter afin ki li capave faire so la voix tender. *Alhamdulillah* ena bane radios privées sans quoi Allah (swt) même conner ki bane minorités ti pour passer dans sa pays là. Là aussi kan bane radios privées pé faire zot travail couma bizin, premier ministre là et sa Gouvernement là pé menace zot. Là-même dans sa campagne électorale là, sa quantité insultes pé insulter ene radio privée publiquement, bane insultes diffamatoires, bien grave pour ene premier ministre servi bane tels langages kan pé dénonce zot maldonne et pou sa, jamais sa Gouvernement là pas pou donne télévision privée.

La MBC TV c'est l'éventail du roi, et le roi appartenir tous les temps à ene seule communauté. Pourtant nous tous lor nous Bill CEB, tous paye Rs. 200 pour MBC TV. Par contre pou bane radios privées pas paye ene roupie. Ou conner la liste la trop longue pou dire couma bane minorités et surtout la Communauté Musulmane pé souffert beaucoup dans tous secteurs. Si nous ena pour énumère bane injustices ki nous la Communauté Musulmane pé souffert, la liste là trop longue.

C'est pour sa mo demande tous nous bane frères et sœurs de la Communauté Musulmane, oublier nous bane divergences lors certain z'affaires. Nous penser ki nous mette nous ensemble en tant ki musulmans, ki nous tous pratique tous les

jours *Salat* pour Allah et nous croyance ferme lors les 5 piliers de l'islam. Séki nous établi nous ferme lors : **Laa-ilaaha illallah Muhammadur Rassoolullah**. C'est sa le principale et fondamental et nous unir comme ene seule *Ummat*, ene seul famille ki nous croyance lors l'unicité d'Allah li ferme et pas laisse nous diviser et pas la guerre entre nous même. Lerlà l'union pour faire la force, kot nous tous pour derrière ene chef spirituel, ene choisi d'Allah avec le *Roohil Qoudouss* [le Saint Esprit] ki vine du ciel et pour ena la paix et l'obéissance à l'unanimité pour le progrès de la Communauté Musulmane de côté matériel et spirituel. *Insha-Allah*.

Pas mette ou confiance lors créature, place ou confiance et l'espoir lors ou Créateur. Et maintenant surtout sa régime là, ou conne très bien ki li fine faire, li fine enlève **MPL** (*Muslim Personal Law*) et azordi même, bane ki fine marier sous **MPL**, l'état civil pas reconnaitre zot. Pour bizin marier sous code napoléon. Marier d'après système *Kuffar*. Li malheureux sa ki aucaine ministre ou député musulman pas fine capave corrige sa l'injustice à l'égare de la Communauté Musulmane. Donc, nous grand z'arme c'est faire *duahs* avec nous Créateur. Li-même Meilleur Juge et Le Tout-Puissant.

إِنَّا صَابِرِينَ

**Innallaaha ma-as Saabiriin.**

*Allah reste avec bane ki ena patience.*

Ki Allah établi So Justice lor la terre, ene telle justice ki aucaine l'homme pas pou capave défaire, car c'est par la grâce d'Allah ki la Communauté Musulmane pou capave épanouir et prospérer et ki l'humanité pou capave être sauver, sans la haine, ni vengeance, mais avec amour et justice ki vine de côté d'Allah, et couma nous maître, le Saint Prophète Muhammad (saws) fine enseigne nous. *Insha-Allah, Ameen*.